



Minggu, 17 Nopember 2024
Ogen: Kejadin 29:16



Anak Sintua



Lea, ia sekalak anak diberu. Anak sintua i tengah jabu Laban. Laban e mama Jakup. Ia tading i Mesopotami. Gelarna mulai tersinget bas kitab Kejadin 29. Benaken Kejadin 29 enggo mbue nuriken kerna kecibal kegeluhen Lea. Seninana e me Rahel. Sebage anak sintua mbue tuhu tanggungjawab si arus ilakokenna. Bas jamanna anak sintua e ibereken hak, tanggungjawab ras keistimewan. Si enda banci si idah arah turi-turin kegeluhenna si ku lebena bas pustaka Si Badia. Anak sintua anak si patuh man orangtua. Kepatuhenna teridah arah ndalanken kerina siniaturken orang tuana man bana. Sitik pe la lit ituriken maka ia nilah bas siniaturken orang tuana man bana, terkusus bas perjabunna. Labo lit si oge maka lit perarihen orang tua ras ia kerna perjabunna, tapi kai sioratken orang tua bage me ilakokenna. Banci jadi sie erkiteken pengajaren siniajarken maka anak e arus patuh man orang tua, tambah tolona banci ka nge tek ia maka orang tua pasti mereken si mehulina man kegeluhen anak-anakna. Anak sintua e me penggelaren si ibereken tole man orangtua.

Bas Padan si Mbaru ngataken maka Jesus e me anak sintua, bas ia lit biak Dibata, jadi usihen man seninana (agi-agina). Hak anak sintua e me jadi pewaris bas kerina si lit bas orang tuana nari. Genduari kita me anak sintua e, oratna si cidahken arah kegeluhenta maka kita patuh man bapanta e me Jesus Kristus, sabap kita me jadi pewaris kerina pemere si rehna bas IA nari. Cidahken dage kepatuhenta arah pengerana ras perbahanenta si tep-tep warina. Jadilah anak sintua si maba dengen ngajari kalak si deban uga kin arusna patuh man pengajaren siniajarken orangtua.

Jadilah anak sintua si maba kiniulin.